

Fimaiya jito

Cómo se dieta al primer hijo

Hipólito Candre (HC)

Adofiki (Cordillera), río Igaraparaná,, junio 28, 1992

- Nii ua fueñe moo komekimo ite rafue,
¿buu mei yinoga? HC
- Ie jira fueñe komuide jito, moo
komekimo ite ñuefuedo uurite, ebena
uriñede jito. HC
- Abimo eroikana uurite jito, moo izoi
komuide, moo uaina uairede, jiaima abi
faigatañede, jiaima komeki fieni
finoñede, jito. HC
- Einamaki rafuena uaitañede, yetaka jito. HC
- Oni jiaima jiza uridoñede, oni jiaima
mamekina iañede, yetaka urue abina
onode. HC
- Ie jira ie izoikana birui komuide urue,
moo ite abiri, ei ite abiri, ebena uurite. HC
- Ie jira yetaka jito daama ñuera uai
komekimo yinote. HC
- Ñuera urue uriya yezika nana kai
jiyodikai, ñuera urue uriya yezika
einamaki: jadi nii ua jibina uai, ua diona
uai daide. HC
- Ie yezika eikome jiyode, eiringo jiyode,
ua urue uriya, taijiena onodimie uriya. HC

Ie baifene afe izoide urue izifuena
kakañede, faidorafuena kakañede,
yagueroiyana onoñede, daa ñuera
rafuena onode. HC

Fui bai batinomo ja ie ringomo ie
erokaiye jiyaki, ie jira abi fimaide, ie uai
fimaide, nii rafuena kakadimie, nii rafue
jenodimie, nii jiiibina uai yinnotimie,
diona uai yinnote, raana onoiyena,
kaikoni ite irafuena onoiyena, kaikoni
ite jenuizaina onoiyena. HC

Ie jira aki uaido jiiibie dute, aki uaido
diona finode. HC

Ie izoikano ite jae fueñe moo jenoka
jiiibina uai diona uai yinnote. HC

Ie izoikana kai uai iya meinona, ¿jae
ninomo ite?, daidikai iadi, nano bie nia,
jaka menade. HC

Fui bai batinomo ja ua uruena kiode, fui
batinomo fui ringozana kiode, eroikana
uriya baife afeno ite. HC

Iedo jae einamaki jiaimana onode, fia
kaimare ie uriya yezika jiyode, fia
kaimare ie komeki manaide, iedo uriyari
eiringo jiyode, jizakuru jiyode, jaieniki
jiyode. HC

Birui daaje jiiibina, daaje dionado
uuritikai, daidikai iadi, ieñede uaido,
jiiibina finode, diona finode. HC

Iekoni ¿buu meaidaite?, kai einamaki
abimo rafue otikai, iena onoñedikai, iena
¿buu uriya?, kai daina, iena duiko
daidikai, daani tainue kai uibiya. HC

Ie baifemo iena imie daidikai, imiiena
iñede, jaka ua jiaima mameki bairia
baifene. HC

Ie mei kaikoni daii ite irafuena onoñede,
daani kaikoni ite zegofuena onoñede,
kaikoni ite aruifuena onoñede, komena HC

imie daidikai.

¿Neemei kai jenoka?, kai daina, ¿neemei
kai baiga?, kai daina, baiñedikai,
onodikainia imie daiiñedikai,
onodikainia einamaki abi faigatañede.

HC

Akie izoikana ite.

HC

Imiemo rafue komekimo ite, mei onode,
jenode, jenoka raa baiga, biki komekido
uurite, ua diona jagiyi, ua jibina jagiyi,
ie izoikana uurite urue, fui baina ie yoye,
taino ie yoi dainano.

HC

Ie jira eroikana uurite, afenori ñuefue jae
fiebite.

HC

Ie meinona taino uaido jaaidikai, iena
onodikue daidikai, onodikainia nia aki
daii uuritikue, onodikainia nia uafue
yotikai.

HC

Ie mei onoñedikai, ringo uaido jibie
dutikai, ebe uaido yera metikai, ¿neemei
akie izoide?, iena nairai daidikai, nairai
iñede, fia uibikafue.

HC

Yoye iñena jira taino yotikai, bene ua
uai iya meinona, bene moo komeki iya
meinona, taino yotikai, kai ui kioñede,
kai komeki tuuiñede, ie meinona tainodo
uuritikai.

HC

Akie izoide, fimairitimie baiga, ie ebena
uriñedimie baiga, imie komekimo rafue
jooide, ñuera jira, ñuera yetarafue, imie
komekimo ite, uafue yote kai daina,
imiemo jaka ua nabedi jibina uai uriya,
diona uai uriya, nabefuena.

HC

Ie yezika nai dinona iñede, ie yezika
buuna uriñede, dama buinaima uriya, ua
buinaima komeki uriya.

HC

Ie yezika eiño buinaiño uriya, manaide
uai, naimerede uai, kaimarede uai.

HC

Ie yezika jibina kaimare naidaide, diona
kaimare naidaide, ie jagiyido urue ñue

HC

inide, ringoza inide, eikome inide,
jaieniki inide.

Ie mei buinaima uriya, ñue zuitade,
jiyotate, manaide, zuujikaide, akie izoi
ite.

¿Neemei omoi yoia iñede?, ¿nieze
iñeite?

Moo komeki jaka iniñede, moo komeki
kaade, akie izoide rafue yinnote, urue
uriya.

Jae aki daii einamaki uurite, ie jira
¿buumo ite?, kue daina, ¿buumo uafue
jooide?, kue daina.

Daidikue iadi, buuna iñede, taino kai
jenua, nibai bai ite, kai daina, ie baina
iñede, jaka bie ñie, ua raa jinoñede, ua
raa ebinide, akie izoide.

Meita bai rafue ite omoi daiiza, bai rafue
iñede, koni abina onodimie uriya,
komeki yooide, komeki eroide, jefo
kakaide, ninomo.

Dinori uafuena monaide, dinori ja ua
jiefuena monaide.

Neemei rairafue iñede, akie izoikana
uriya yezika, eiño daaje izoi uurite,
ñuefue atide, ñuefue komuitate, ñuefue
moziñote.

Daaje izoi moo, akie izoide, uruiái figo
iri, abina onoitomoi, ja moo daide.

Rafue feeitaiza, rafue uaitaiza, moo
daide, neemei omoi daiiza.

Koni iima iima, nieze tainona kai uriri,
moo ja daide, komuiyafuemo jenode,
moo komuiñeno daiiñede, moo komuite
daide.

Ie jira komuiya uaido, jiibie dute, diona
finode; eiño farekatofe finode, urue
eroikana taijide.

HC

HC

HC

HC

HC

HC

HC

HC

HC

HC

HC

HC

Nii ñuera uai, ¿neemei iñede?, kai daiiri.

HC